



**Komunikadu Imprensa**  
**27 Novembru 2023**  
**Munisípiu Kobalima**

**JSMP fasilita treinamentu kona-ba demokrasia, partisipasaun públiku iha prosesu halo lei no asesu ba justisa formál iha Suku Labarai**

Iha loron 20 Novembru 2023, JSMP fasilita treinamentu ba estrutura suku no comunidade sira iha suku Labarai, Postu Suai Vila, Munisípiu Covalima.

Matéria sira ne'ebé kobre iha treinamentu iha sesaun dadeer ko'alia kona-ba demokrasia, prosesu halo lei no asesu ba justisa formál. Matéria treinamentu ne'e fahe ba sesaun rua, sesaun dahuluk kona-ba sistema polítika ka demokrasia no sesaun daruak kona-ba sistema justisa.

Atividade ne'e halo ho objetivu mak atu hasa'e koñesimentu lideransa komunitária no membru comunidade sira-nian koñesimentu kona-ba demokrasia, direitu umanu, knaar órgaun soberanu, partisipasaun públiku iha prosesu halo lei no asesu ba justisa formál.

*“Partisipasaun públiku iha prosesu lejislasaun ne'e importante hodi nune'e bele assegura lejislasaun no politika sira ne'e refleta duni realidade. Tanba ne'e, treinamentu ida ne'e importante tebes hodi bele ajuda hasa'e koñesimentu públiku nian kona-ba prosesu demokrasia, órgaun estadu sira ne'ebé iha kompeténsia hodi elabora no halo lei sira no oinsa pública sira atu bele hola parte ativu iha prosesu sira ne'e”; dehan Diretora ezekutivu JSMP, Sra. Ana Paula Marçal.*

Partisipa iha atividade treinamentu ne'e membru estrutura suku sira mak hanesan, xefe suku, xefe aldeia, delegada no delegadu, lia na'in sira no representante joventude feto no mane inklui comunidade. Totál participante hamutuk ema na'in 38 kompostu husi feto 25 no mane 13.

Iha sesaun dahuluk, JSMP fahe informasaun kona-ba saida mak demokrasia, prosesu halo lei no oinsa comunidade sira bele ezerse sira-nia direitu, hola parte no partisipa ho livre, sekretu iha eleisaun, saida de'it mak knaar husi órgaun soberanu sira hanesan Prezidénsia Repúblika, Parlamentu Nasionál, Governu no Tribunál.

Iha sesaun daruak, JSMP fahe informasaun kona-ba direitu sira. Alende ne'e, JSMP esplika kona-ba knaar no kompeténsia husi instituisaun sira iha sistema justisa nian hanesan Tribunál, Ministériu Públiku, Defensoria Pública, Advokasia Privada no polísia inklui introdús kona-ba JSMP nia serbisu asisténsia legál ba vítima violénsia bazeia jéneru. JSMP intodus ba partisipante sira atu bele halo kontaktu ho JSMP banihira comunidade sira iha Labarai hasoru problema ruma ka família ruma hetan violénsia.

Iha abertura Sr. Abilio dos Santos, hanesan PASS suku Labarai ne'ebé reprezenta xefe Suku atuál Suku Labarai, sente haksolok ho atividade treinamentu ne'ebé fasilita husi ekipa JSMP, no ida ne'e hanesan oportunidade ida ne'ebé di'ak tebes tanba formasaun ida ne'e foka ba asuntu demokrasi no oinsa públiku bele hola parte, alende ne'e mós ko'alia mós kona-ba prosesu justisa formál, oinsa comunidade sira bele lori sira kazu ba prosesu tuir dalan formál.

Iha enseramentu Xefe Suku elito Sr. Paula de Sena, agradese ba JSMP no sente haksolok tanba nia hamutuk ho ninia estrutura suku sira, xefe aldeia sira, delegadu-delegada, lia nain sira, maske formálmente seidauk hetan toma pose, maibé ami bele hetan ona formasaun husi JSMP. Hau sente haksolok formasaun ida ne'e ajuda tebes ami estrutura suku iha koñesimentu kona-ba ami nia direitu báziku no oinsa estrutura suku sira iha koñesimentu kona-ba kazu sira ne'ebé ami bele resolve no labele resolve. Hau rezprezenta estrutura suku eleitu sira nafatin rekomenda ba JSMP atu iha futuru depois ami hetan toma pose JSMP bele kontinua halo atividade hanesan iha sira nia suku, liuliu foku ba oinsa ami bele lori kazu sira atu prosesu tuir sistema justisa formál.

*Treinamentu ne'e realiza ho apoiu finanseira husi Governu Timor-Leste, liuhusi Fundu Sosiedade Sivil, Diresaun Serbisu Apoiu Sosiedade Sivil no Auditoria Sosiál (SASCAS), Gabinete Primeiru Ministru.*

Atu hetan informasaun liu tán bele kontaktu:

Sra. Ana Paula Marçal  
Diretora Ezekutiva JSMP  
Email: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)